

Distgargar hotellaria tar la taglia sin packages

Chombra pitschna di gea a moziun Engler

■ **(anr/vi) Hotels fan gugent amogna packages cun pernottaziun, viadi, pass da skis ed auter. Las prestaziuns èn però suttamessas a differentas tariffas da taglia. Cun 25 cunter 18 vuschs ha Stefan Engler (pcd/GR) dumagnà atras ier en il cussegl dals chantuns in levgiament.** Da preschent vala la regla: In package che cuntegn almain 70 pertschient prestaziuns cun tariffas reducidas vegn suttamess entiramain a la tariffa reducida. La moziun pretenda da sbassar la sava sin 55 pertschient. «Prendain nus per exempel ina pernottaziun a San Murezzan per 170 francs ed in pass da skis al Corvatsch per 79 francs», ha argumentà Engler. Già quest pitschen package na possa oz betg vegnir suttamess a la taglia

reducida damai ch'il pass da skis fetschia ora passa 30 pertschient. Per mintga prestaziun stoppian ins en quest cas pia calcular in'otra tariffa sin plivalur.

Win-win per giast ed hotel

Cun sbassar la sava possian ins finalmain porscher packages pli attractivs ed evitar birocrazia, ha ditg Engler. Ins rinforzia la collavuraziun en las destinaziuns turisticas.

La «strategia per turissem» da la confederaziun cuntegnia 31 giadas il pled cooperaziun e punctueschia che quella saja in factur da success. Cun in tal levgiament per packages daventia la collavuraziun pli simpla tant per ils hotels sco per

auters purschiders. Plinavant profite-schia il giast da pudair retschaiver tuttas prestaziuns or dal medem maun. I sa tractia d'ina situaziun win-win per tuts cumpigliads.

Il cusseglier federal *Ueli Maurer* è sa dustà cunter la moziun ed ha discurrì d'in tractament inegal dals clients: Tgi che pernotteschia en in hotel paja uschia pli pauc per tschertas prestaziuns. En vardad sa tractia quai d'ina «ulteriura subvenziun per la hotellaria». Ins veglia impedir in dischavantag per autras branschas. La proxima intervenziun che pretendia anc ulteriuras distgargias vegnia segir e franc, ha ditg Maurer.

Davart la moziun ha uss anc il cussegl nazional da decider.